

Sawcuengh Miz Yungh Lai

壮文用处大

贵港市覃塘区蒙公乡凌寺小学三(1)班 卢嘉



Seizneix gou doeg sam nienz-gaep lo, youq ndaw hagdangz gou hag ndaej haujlai cihsiz Sawcuengh. Gangj daengz Sawcuengh, gou lij aeu docih daxbuz gou ne, dwg singfwen Vahcuengh ndei dingq daxbuz yinx gou haeujmaez, hawj gou gyaenz hwnj Sawcuengh.

Geiq ndaej miz ngoenz ndeu haetromh, raq sing ndeu cauz singi gou lo, gou nunu da hwnqcong le, riengz gij sing byaij bae, byaij

daengz bakcauq, raen daxbuz cingq ciengq gijmaz go. Gou geizheih dwk cam daxbuz: "Daxbuz ha, mwngz ciengq gijmaz go ha? Ndei dingq bw." Daxbuz riunyumnyum naeuz: "Lan ya lan, duzroeg gwnz faex hemqcaca, gou ya gou, dawz fwen daeuj ciengq ya dawz fwen ciengq." Baezneix gou dingq ndaej rox lo, dwg fwenh Vahcuengh. Daxbuz lumj fwt siengj hwnj gijmaz nei, ngeux gyaauj gvaqdaej, naeuz: "Lan ya, ndaw hagdangz mwngz mbouj dwg son Sawcuengh ha? Baezlaeng mwngz hag de, hag ndaej ndei le, ndaej bang gou dawz fwen geiq roengzdaej lo, yienghneix ha, couh miz engq lai vunz rox eufwen lo." Gou baez dingq, roxnyinh daxbuz gangj gij vah gig miz dauhleix.

Doeklaeng, gou bae hagdangz couh nyinhcaen hag Sawcuengh, doeg Sawcuengh, lauxsae hwnjdangz seiz, gou couh nyinhcaen dingq, baez

bungz daengz miz maz mbouj rox couh cam doengzhag, cam lauxsae.

Sam bi gvaqbae lo, gou hag ndaej le haujlai cihsiz Sawcuengh, seizneix gou ndaej bang daxbuz geiq fwen lo.

gou bang daxbuz aeu fwen baen baenz cek geiq roengzdaej, ndaej-hoengq seiz, daxbuz couh caeuq buzlaux, goenglaux ranznden comz youq itheij eufwen, dou bang lwgnyez neix couh itmienh yawj cekfwen itmienh gaen daxbuz eu, coenzcoenz fwen eu ok bak, singsing fwen geiq haeuj sim, bouxlaux rox eu, dou lwgnyez hix rox eu, sing fwen goksasa. Caen dwg:

Bouxcuengh Bouxcuengh gangj Vahcuengh

Sawcuengh Sawcuengh yungh-cawq lai

Daxbuz eufwen gou daeuj geiq

Daengxheij eufwen goksasa

(指导老师:韦丽平)

Aengoj Gou Caeuq Duzmeuz

我和小猫的故事

贵港市覃塘区蒙公乡高占小学六(2)班 吕雯

Gou daj iq couh gig gyaenz duzmeuz, dinglingz miz ngoenz ndeu, gou youq gwnz loh gip ndaej duz meuz ndeu dauqma. Duzmeuz daengndang bwn hau, cik ganaj de deng sieng lo, gig hojlien, gou yaek ndeindei bang de yw sieng.

Duzmeuz haidaeuz cungj mbouj haengj gwn doxgaiq, itcig meumeu heuh mbouj dingz. Dwg ga de in lai ba, gou couh umj de bae hawj canghyw ndaw mbanj yw. Ga sieng bau ndei le, gou caiq dawz di cuk daeuj hawj de gwn, baezneix, de diemzsi gwn lo. Duzmeuz song ceh da ndongqliklik cimyawj gou, lumjbaenz doiq gou gangj: "Mwngz caen ndei! Docih mwngz!" Gou ciengzseiz bang duzmeuz dajcaemx,


seiz ndaejhoengq gou couh daiq de bae youzbyaij. Ciemhciemh dwk, gou caeuq duzmeuz baenz baengzyoux ndei lo. Duzmeuz yied maj yied dwggyaez lo.

Miz baez ndeu, gou lumj bingzseiz ityiengh daiq duzmeuz bae rog youzbyaij. Gou cingq angqvauvau dwk byaij bae naj, sawqmwh, baez mbouj siujsim, din dik deng ndaek rin deng sieng lo, lwed baenz ndik baenz ndik ndik roengz lajnamh, gou in ndaej hemqyoyo. Duzmeuz raen gou yienghneix, couh vax di nywj daeuj hawj gou oep sieng, yienzhaeuh buet deuz lo. Geizgvaic, gij sieng mbouj caiq ok lwed lo, daxmeh hix daeuj lo. Yenzlaiz dwg duzmeuz bang gou bauqsaenq, gou

laihnaeuz de mbouj leixlangh gou ne! Daxmeh naeuz: "Go' nywj neix heuh guh rumhaeu, ndaej dingz lwed." Yo, duzmeuz caen coengmingz ha!

Neix couh dwg aengoj gou caeuq duzmeuz, mwngz yawj duzmeuz geijlai dwggyaez ha!

(指导老师:陈彩仙)



Neix Couh-dwg Gou

这就是我

贵港市覃塘区蒙公乡凌寺小学三(2) 覃涵钰

Gou heuh Mingzmingz, bi neix 9 bi lo, doeg siujyoz sam nienzgaep.

Gou sang 1.3 mij, miz doiq da ndongqliklik ndeu, bwnda raezram gig ndei yawj. Gou bak iq ndaeng sang, daihgya cungj gangj gou maj ndaej gig dwggyaez, couh lumj lwgndiqbaengz nei. Gou gyaenz habsib, aenvih cijmiz hagsib ndei le majhung cij ndaej guh gij saeh swheij siengj guh haenx. Cawzliux hagsib, gou lij gyaenz dwk binghbanghiuz, diuqcag, buet, aenvih yienghneix gojiy lien ndangdaej. Gou lij seizseiz bang bohme guh hongranz, gyoengqde guh hong dauqma couh ndaej gwn gij ngaiz homfwtfwt gou cawj haenx.

Vunz bouxlawz mbouj miz gietdiemj ne? Gij gietdiemj gou couh dwg mbeiiq mbouj maij gangjavah. Moix baez hwnjdangz, gou cungj dwg dinghdingh naengh dwk, dingq doengzhag hoizdap vwndiz. Miz seiz gou hix siengj ndwn hwnjdaej hoizdap vwndiz, hoeng cungj mbouj gamj. Gou itdingh gaij aen gietdiemj neix bae.

Neix couh dwg gou, dahniq dwggyaez youh mbeiiq ndeu.

(指导老师:杨金梅)



Daxau gou dwg boux siujyoz lauxsae, de samcib lai bi, mbouj sang mbouj daemq, daiq fouq nganxingq ndeu, yienghceij gig swnhsienh. De gig gyaenz yawjsaw, moix baez raen bonjsaw habhoz, couh itdingh aeu cawx, baez cawx ma le, aeu saw yawj

Daxau Dwg Boux Sawmaez Ndeu

叔叔是个书迷

贵港市覃塘区蒙公乡凌寺小学六(1)班 庾格伟

sat cij cuengq roengz, caen dwg boux sawmaez dahraix.

Geiq ndaej miz baez ndeu, gou bae ranz daxau guhcaemz, mehsimj couh heuh daxau bae cawx byaek. Daxau gig vaiq dapwngq lo. hoeng mehsimj mbouj cuengqsim, heuh gou itheij bae, cujyau dwg bae gamduk daxau. Mwh dou gwih ci daengz bakdou Sinhvaz Suhden, daxau roengz

ci doiq gou naeuz: "Gou haeujbae yawjyawj miz mbouj miz saw moq, mwngz youq gizneix caj gou yaep he." Gou gangj: "Mehsimj mbouj hawj haeujbae bw." De gangj: "Lanmbauq, gou couh bae yaep he, mwngz mbouj gangj, byawz hix mbouj rox." Gou caengz dapwngq, daxau couh haeujbae lo, gou cijndei youq rog bakdou caj de. Daih' iek gvaq le buenq diemj cung,

lij mbouj raen daxau okdaej. Gou singip lo, danghnaeuz caiq mbouj okdaej, mbwn couh laep lo. Gou nyaenx mbouj ndaej buet haeuj ndaw suhden bae yawj, cij raen daxau maeuq youq henz gyaqsaw, song fwngz bungj bonj saw he, yawj ndaej haeujmaez sisi. Gou vaiq byaij gvaqbae, sing hung dwk doiq daxau naeuz: "Daxau, vaiq bae cawx byaek ba, mboujne byaek vunz cungj gai liux lo." Dingq gou yienghneix gangj, daxau cij singi gvaqdaej, rag dawz fwngz gou buet okdaej, gipgip muengzmuengz bae cawx byaek.

Daxau gou couh dwg yienghneix gyaenz yawjsaw, caencingq dwg boux saemaenz ndeu.

(指导老师:陆雪燕)